

Restauracion di Dama di Husticia a inicia

ORANJESTAD – Despues di un periodo basta largo, e monumento di Dama di Husticia di e artista y escultor **Ciro Abath** ta wordo restaura.

E escultura aki a bira victima di vandalismo caminda a kibra e lenso di glas cu ta tapa su wowonan y tambe e balans den su man robes, mientras cu tambe a purba di ranca e spada poni na su man drechi.

E siman aki, e operacion di restauracion di e bunita obra aki cu ta dorna Parke Alameda, na haltura di Corte di Husticia, a cuminsa. E intencion ta pa keda cla full cla prome cu dia 18 di maart, nos dia nacional di Himno y Bandera.

E prome cos cu nan a haci tabata instala e coriente pa asina e luz cu ta ilumina e lenso di glas por a lusa. E artista a prefera di laga e color natural di e capa di brons cu e Dama di Husticia ta bisti.

Despues, den transcurso di ayera e balans di brons a keda instala. Un balans cu ta simbolisa e ekilibrio cu mester existi ora cu ta trata di husticia. Husticia cu a tarda pa por a drecha e Dama di Husticia. Artista Abath a laga sa cu diferente ministerio a aporta pa asina e Dama di Husticia por a keda restaura dunando balor na e plasa historico aki.

